

8. Oqartussaasut kattuffiillu il.il. tusarniaavigineqarnerat

Inatsisissatut siunnersuut nassiunneqarpoq 10. juni 2014, tusarniaanerlu killilerneqarluni 11. juli 2014

Siunnersuut tusarniaanissaq siunertaralugu ukununnga nassiunneqarpoq:

Namminersorlutik Oqartussani naalakkersuisoqarfiit tamarmiusut, KANUKOKA, NUSUKA, KNIPK, Kattuffik Utoqqaat Nipaat, Inooqat, SIK, Kalaallit Nunaanni Sulisitsisut, AK, IMAK, PIP, ASG, PPK, KNAPK, APK, Isumaginninnermut Naammagittaalliuteqartarfik, BDO, Inuit Pisinnaatitaaffiinut Kalaallit Nunaata Siunnersuisoqatigiivi.

Ukua inatsisissatut siunnersuummut oqaaseqaatissaqanngillat

N.P.K.

Aallaqqaasiut

Tusarniaanermut akissuteqaatigineqartut missingiutip imarisaanut tunngassuteqartut pissarsiarineqartut pingaarnersiorlugit kinguliani uteqqinneqarput oqaaseqaateqarfigineqarlutillu. Tusarniaanermut akissutigineqartunut oqaaseqaatit uingasunnngorlugit allagaapput.

Tusarniaanermut akissutigineqartuni ajornartorsiutit arlallit pingaarnertullugit pineqartarsimapput. Tamakku ajornannginnerusumik paasisaqarfiginiarlugit siulliullugit nassuiaaffigineqassapput.

Najukkani siusinaartumik pensionisialinnut isumasioqatigiit:

Tusarniaanermut akissutigineqartut tiguneqartut tunngavigalugit najukkani siusinaartumik pensionisialinnut isumasioqatigiit pillugit inatsisissatut siunnersuummi allanngortitsisoqarpoq. Kommunalbestyrelsip najukkani siusinaartumik pensionisialinnut isumasioqatigiinnut inassuteqartarnissaa, tamatumalu kingorna isumasioqatigiissitap aalajangiisarnissaa tulluurtuunngitsutut nalilerneqarpoq.

Inatsisissatut siunnersuut ima allanngortinneqarpoq kommunalbestyrelsi suliamut paasisutissiisartuullunilu siusinaartumik pensionisianik tunniussisarnissamut aalajangiisartunngussasoq. Aalajangiineq tamanna siusinaartumik pensionisiaqartitsisarneq pillugu maalaaruteqartarfimmut maalaarutigineqarsinnaavoq.

Siusinaartumik pensionisiaqartitsisarneq pillugu maalaaruteqartarfik:

Tusarniaanermut akissutigineqartuni arlalinni siusinaartumik pensionisiaqartitsisarneq pillugu maalaaruteqartarfiup Atuisunut Unammileqatigiinnermullu Aqutsisoqarfimmut inissinneqarsinnaanera periarfissatut erseqqissaatigineqarpoq.

Siusinaartumik pensionisiaqartitsisarneq pillugu maalaaruteqartarfik qitiusumik siunnersuisarfiullunilu ilitersuisarfimmut ilanngunneqarnissaa kissaatigineqarpoq, tassanilu suliama atortussat kommunalbestyrelsen aalajangiinissaanut tunngaviliisussat sularineqarnissaanni piareersarnissaannilu kommuni ikiuuttassaaq.

Qitiusumik siunnersuisarfiup ilitersuisarfiullu aamma Siusinaartumik pensionisiaqartitsisarneq pillugu Maalaaruteqartarfiup suleqatigiinnerisa annerusumik sunniuteqarnissaa anguniarlugu susassaarfiit taakku marluutillugit kattunneqassapput.

Aningaasaqarnikkut atugassarititat

Tusarniaanermut akissutigineqartuni arlalinni siunnersuummi aalajangersakkani unammilligassat aningaasaqarnikkut inuttullu nukissanut sanilliullugit ernumanartoqartillugit oqaatigineqarpoq.

Inatsisartut inatsisissaattut siunnersuut anguniagaqarfiusussaavoq. Naalakkersuisut inatsimmi anguniarneqartut eqqarsaatigalugit imaannaanngitsumik imminnut anguniagassipput.

Peqataanik Naalakkersuisut ilisimalluinnarpaat taamatut anguniagaqarnermi oqartussaasut assigiinngitsut sulineranni unammilligassanik pilersitsisoqartussaasoq, kisiannili tamanna ingerlaruortoqartussaavoq, arlaannillu anguniagaqarfiusussaalluni.

Peqataanik isumalluutinik piginnaasanillu ineriartortitsineq Naalakkersuisuniit immikkut pingaartitaavoq, taamaammallu suliniutinik kommunit atortussanik uppersarsaatinillu sulariarnerinut iluaqutaasussanik aallartitsisoqarsimavoq, tak. ataani allassimasut.

Aningaasaqarnikkut naatsorsuinerni piumasarineqarpoq siusinaartumik pensionisiaqartut siusinaartumik pensionisialinnut aqqissuussinermut ilaajunnaartussat siusinaartumik pensionisialinnut tunniunneqartartut annerpaaffianniit appasinermut inissinneqassasut, inuup nammineerluni sulisinnaassutsiminik tamakkiisumik atuisinnaannginnera pissutigalugu.

Suliffissaqarnermut ilimagisamik attuumassuteqarnissami uuttuutit arlallit naliliiffigineqartarput. Tassunga ilaavoq inuit allaniit pilersorneqarnermiit nammineerluni pilersorsinnaalernissaat. Tamatuma saniatigut ingerlatsinermi suliffissanut periarfissat nutaat ingerlaavartumik ineriartortinniarnearput, tamatumanilu najukkani suliniutinik aqqissuussinernillu sulisinnaassutsip ineriartorteqqinnissaanut iluaqutaasinnaasunik aallartitsisoqarnissaa. Taakku saniatigut kissaatigineqarpoq siusinaartumik pensionisiaqartut nukinnik namminneq pigisaminnik tapeeqataasassasut, suliffissat eqqarsaatigalugit inuup killeqartumik pisinnaasai eqqarsaatiginagit. Taamaaliornikkut susassaarfiimmi nutaamik eqqarsartoqarnissaanut pisariaqartitsineq erseqqissarneqassaaq, taamaaliornikkullu siusinaartumik pensionisiaqartut siumoortumik nukissat pigisatik aqqutigalugit inuiaqatigiinnut annerusumik iluaqutaasinnaaqullugit, taamaaliornikkullu inuit amerlanerit suliinnarnissaat periarfissinniarlugu. Ataatsimut isigalugu nalilerneqarpoq iluarsartuusseqqinneq tamanna inunni sulilernissamik ikiorneqartuni inuunikkut atugarisatigut pitsaanermik atugaqalernissamut iluaqutaassasoq; aamma inuiaqatigiit aningaasaqarnerat eqqarsaatigalugu.

Isumalluutit

Tusarniaanermut akissutigineqartuni arlalinni erseqqissarneqarpoq siusinaartumik pensionisiat tunniunneqareersut naliliiffigeqqinnerannut atatillugu malunnartumik suliaqarnerulernermik kinguneqarumaartoq, soorluttaaq siunissami kingusinnerpaamik ukiut tallimat qaangiunnerisigut sulisinnaassuseq nalileqqinneqartartussaassammat.

Iluarsartuusseqqinnermi siunniunneqarpoq siusinaartumik pensionisiat tunniunneqartut ukiut arlallit qaangiunnerisigut naliliiffigeqqinneqartassasut. Taamaalilluni siusinaartumik pensionisiat tunniunneqartut inatsisip akuersissutigereerneratigut ukiuni arlalinni ingerlaavartumik misissuiffigineqartassapput. Siusinaartumik pensionisiallip siusinaartumik pensionisiant qinnuteqaatigisimasaanut atatillugu suliamut atortussat atorsinnaasut arlaqartut pigineqarsinnaasassapput, tamakkulu siusinaartumik pensionisiat akuerineqartut nalilersoqqinneranni atorneqarsinnaasassapput.

Siusinaartumik pensionisiat tunniunneqareersut naliliiffigeqqinnerat kommunini suliaqarnerulernermik kinguneqartussaavoq, tamannali periarfissat arlallit atorlugit isumagineqarsinnaassagunarpoq, ilaatigut suliniutip qitiutillugu suliarineratigut. Tamatumani aallarniutaasinnaapput siusinaartumik pensionisiallit isertitaqarpallaarnertik pissutigalugu massakut siusinaartumik pensionisiaminnik 20%-imik millisaaffigineqarsimasut, soorluttaaq sulianik ingerlatsisut arfineq-pingasut allat taaneqareersut kommunit sulianut atortussanik uppersaatinillu suliaqarneranni ikiuuttartussaammata. Naggasiullugu inuit § 9, imm. 2-mi taaneqartut naliliiffigeqqinneqartassanngillat. Tamanna aamma atuuppoq siusinaartumik pensionisialinnut 60-it sinnerlugit ukioqalereersimasunut.

Inatsisissatut siunnersuummut ukua oqaaseqaateqarput:

1) KANUKOKA

KANUKOKA-p kommunit sinnerlugit nalunaarutigissavaa, inatsisissatut siunnersuummut atatillugu tusarniaanermut akissuteqartoqassanngitsoq tusarniaaneq tunngavissaqarluarluni suliarineqarsinnaanngimmat. Siunnersuutip Inatsisartuni oqaluusereqqinneqarnissaanut atatillugu KANUKOKA-p kissaatigaa Inatsisartuni ilaasortat ilisimatinneqassasut kommunit inatsisissatut siunnersuummut tusarniaanermut akissuteqarsimanngimmata, Namminersorlutik Oqartussammi kommunillu akornanni qaammatip juulip tusarniaaviunnginnissaanik isumaqatigiissutaat eqqortinneqarsimanngimmat.

KANUKOKA-p tusarniaanermut akissutaa tusaatissatut tiguneqarpoq. Kingorna KANUKOKA peqquneqarpoq 15. august nallertinnagu oqaaseqaateqaammik saqqummiussaqaassasoq, taamaalilluni inatsisissatut siunnersuut tusarniaanissami eqqortumik piareersarneqarniassammat.

2) Kommune Kujalleq

Isumasioqatigiinnut tunngatillugu:

Kommune Kujalleq erseqqissaavoq kommunalbestyrelsip aamma siusinaartumik pensionisialinnut isumasioqatigiissitap akornanni pisinnaatitaanermut erseqqinnerusumik killiliineq takujuminaatsuummat.

Tamatumani isumasioqatigiissitap pilersinnissaanut siunnersuutigineqartumi pisortat ingerlatsineranni inatsisitigut ajornartorsiuteqartoqarnissaa kommunip takusinnaavaa, isumasioqatigiissitallu aaqqissuussaanaera eqqarsarnartoqartillugu.

Tusarniaanermut akissutigineqartut tunngavigalugit isumasioqatigiissitap aaqqissuunneqarnera allanngortinneqarpoq, taamaammallu kommunalbestyrelsi siunissami siusinaartumik pensionisianut tunniunneqartunut aalajangiisartussanngorluni.

§ 15, imm. 4-mut:

Inatsisissatut siunnersuummi § 15, imm. 4 illuatungeriinnik tusarniaasarneq pillugu suliassat suliarineqartarnerat pillugu inatsimmi malittarisassanut nalinginnaasunut qanoq attuumassuteqarnera takujuminaappoq.

Oqaaseqaatigineqartut tusaatissatut tiguneqarput, § 15, imm. 4-lu inatsisissatut siunnersuummiit peerneqarluni.

§ 11-imut

Kommunip ilanngullugu maluginiarpaa inatsisissatut siunnersuutip § 11-ianut nassuiaammi allassimasoq, tassalu naalackersuisoqarfimmuut pineqartumut tunngatillugu siusinaartumik pensionisiat pillugit maalaaruteqartarfik arlaannaannulluunniit attuumassuteqanngitsoq pilersinneqarniartoq. Taanna immaqa inatsimmi aalajangersakkanut oqaasertaliussinermi erseqqinnerusumik takuneqarsinnaasariaqaralarpoq.

Oqaaseqaatit tusaatissatut tiguneqarput, aalajangersakkamilu oqaaseqatigiit allanngortinneqarput.

Tassunga assingusoq kommunit isumasioqatigiivisa kommunimilu pineqartumi kommunalbestyrelsip akornanni arlaannaannulluunniit attuumassuteqanngitsumik isumaginnittarfeqarnissaa nassuiarneqanngilaq. Apeqqutip tamatuma erseqqissumik nassuiarneqarnissaa Kommune Kujallermit kissaatigineqarpoq.

Tusarniaanermut akissutigineqartut tunngavigalugit isumasioqatigiissitap aaqqissuussaanaera allanngortinneqarpoq, najukkanilu isumasioqatigiissitat atorunnaarsinneqarlutik.

Kommunip isumasioqatigiivisa aalajangiinerinik naammagittaalliorsinnaaneq eqqarsaatigalugu Kommune Kujallermit maluginiarneqarpoq inatsisissatut siunnersuummi naammagittaalliornissamut piffissarititanik atuuttoqanngitsaq.

Oqaaseqaatit tusaatissatut tiguneqarput, naammagittaalliuuteqarnissamullu piffissaliussaq sapaatip akunnerinut sisamanut killilerneqarpoq.

§ 10, imm. 3-mut:

Inatsisissatut siunnersuummi § 10, imm. 3 malillugu kommunini siusinaartumik pensionisialinnut isumasioqatigiissitap suleriaasissaanut, suliassaanut, akisussaaffiinit ilaasortallu akissarsiaqartinnissaannut malittarisassat Naalackersuisunit aalajangersarneqartussaapput, tamannalu kommunip piginnaatitaaffittut annertuutut isigaa.

Tusarniaanermut akissutigineqartut tunngavigalugit isumasioqatigiissitap aaqqissuussaanaera allanngortinneqarpoq, najukkanilu isumasioqatigiissitat atorunnaarsinneqarlutik.

Kommunip inatsisissatut siunnersuummi ajornartorsiut alla ataaseq takusinnaasaa tassaavoq, nakorsat oqaaseqaataat siusinaartumik pensionisiat pillugit suliassanik suliarinninnermut ilaasussat qinnuteqartup sulisinnaassusaanik naliliinnermut ilaatinneqannginnissaat aamma suliap aalajangiiffiginera pillugu inassuteqartoqartassanngitsaq. Tamatuma kingunerisinnaavaa peqqinnissaqarfinni mikinerusuni ikittuinnarnik nakorsaqarfiusuni, nakorsamit imaluunniit nakorsaanermit isumasioqatigiit suliarinninnerannut peqataasartumit nakorsatut oqaaseqaasiortoqarnera.

Iluarsartuusseqqinneq aqutigalugu nakorsat oqaaseqaataannik periutsinillu aalajangersimasunik atuisoqalernissaa kissaatigineqarpoq, taamaaliornikkut nakorsat tamarmik nuna tamakkerlugu nakorsap oqaaseqaataannik assigiinnik immersuisalissammata, taamaalillutillu nakorsap oqaaseqaasiorterani piumasarineqartunik innuttaasumut tunngasunik taamaallaat oqaaseqaateqarsinnaanngortillugit. Siunissami nakorsap oqaaseqaataat kisimik aalajangiiffigineqartuni atorsinnaasariaqassapput. Susassaqarfiit akimorlugit sulisuniit aalajangiiffigisassaq aalajangerneqartassaaq suliamut atortussat tunngavigalugit.

Aningaasalersueriaaseq pillugu:

Kommune Kujalleq isumaqarpoq siusinaartumik pensionisiantut susassaqarfiup aningaasalersorneqarnissaata nassuiarneqarnera inatsisissatut siunnersuummi ersernerluttoq: Inatsisissatut siunnersuummut nassuiaatini nalinginnaasuni piffissap ikaarsaariarfiup kingorna kommunit 100 procentimik aningaasalersuisarnissaat nassuiarneqarpoq. Piffissami ikaarsaariarfimmi tassani aningaasalersueriaatsip suli 50/50-iunissaa inatsisissatut

siunnersuummi toqqaannartumik oqaasertaqarnera imaaliillaannarlugu
takuneqarsinnaanngilaq, kommunillu tamakkiisumik aningaasaliinissaat kisimi
taaneqarsimalluni.

*Iluarsartuusseqqinnermi siusinaartumik pensionisiaqartitsinerup aningaasalersornissaa
kommunit tamakkiisumik aningaasalersorneqartussanngorlugu nuunneqassasoq
siunertaavoq. Siusinaartumik pensionisiat tunniunneqartut naliliiffigeqqinnissaat tikillugu
nunatta karsia kommunillu qangatut peqatigiillutik aningaasalersuisartussaapput,
tamatumalu kingorna kommunit tamakkiisumik aningaasalersuilersussaallutik.*

Kommunit ikaarsaariarnermit tamakkiisumik aningaasaliisalnissaannut qanoq
iluaquserneqarnissaat pillugu nassuiaat amigaatigineqarpoq.

Tamanna ilutigalugu inatsisissatut siunnersuummi malittarisassaqarpoq immikkut ittumik
pisoqartillugu Naalakkersuisut aningaasaliissutissaminnik unitsitsinnaanerat pillugu.
Aalajangersakkamut nassuiaatini pineqarsorinarpoq utertitseriaasissaq, taamaassappallu
kommunit aningaasaliissuteqartarnerat oqaluuserissallugu naapertuutissanngilaq.

*Oqaaseqaatit tusaatissatut tiguneqarput, aningaasalersuisarnermilu uninngatitsisarnissamut
aalajangersagaq atorunnaarpoq.*

Oqaaseqaatit allat:

Nassuiaatit nalinginnaasut nassuiarneqarneranni aallaqqaatigalugu inatsisissatut siunnersuutip
pisortanut aningaasaqarnikkut allaffissornikkullu kingunissai nassuiarneqarput,
allassimallunilu iluarsartuusseqqinnikkut naatsorsuutigineqartoq siusinaartumik
pensionisartut amerlassusaat ukiuni aggersuni malunnaatilimmik ikileriassasut kiisalu
amerlanerujartuinnartut suliffeqarfinnut aalajangersimasumik atassuteqalersimassasut,
taamalu annikillisanik siusinaartumik pensionisiaqalissasut. Kommunip kissaatigaa
inatsisissatut siunnersuummut nassuiaatit, taamatut nalililiinermi tunngavigineqartut,
erseqqinnerusumik nassuiarneqassasut.

Aallarniutigalugu aningaasaqarnermut oqaaseqaatigineqartut innersuussutigineqarput.

Tamanna nangillugu inatsisissatut siunnersuut aqutigalugu pisortaniit tunniunneqartartunut
anigaasartuutit qanoq kinguneqarumaarnersut imaluunniit isumaginninnermut
anigaasartuutaasut allat allatut attorneqassanersut pillugit tunngavilersukkamik naliliineq
amigaataavoq.

Aallarniutigalugu aningaasaqarnermut oqaaseqaatigineqartut innersuussutigineqarput.

Inatsisissatut siunnersuut suliat ingerlaannartumik suliareqqinneqarnissaat pillugu piumasaqaammut akerliusutut isikkoqarpoq, tassami siunnersuummi § 6 malillugu sulisinnaassutsip ataavartumik apparsimanissaa siusinaartumik pensionisiaqalernissamut piumasaqaataammat.

Sulisinnaassuseq qaqutigoortumik ataannarsinnaasarpoq, piffissallu ingerlanerani allanngorsinnaasarluni. Inuup atugarisaasa allanngorneri tunngavigalugit, aamma inuiaqatigiinni sulilernissamut periarfissat nutaat eqqarsaatigalugit, naalakkersuinikkut nalilernerqarpoq siusinaartumik pensionisiat tunniunneqartut ingerlaavartumik nalilersoqqittarnissaat pisariaqartinneqartussaassoq.

Siusinaartumik pensionisiallip inissisimanagera allannguuteqarsimanngippat pineqartup pissutissaqartumik naatsorsuutigisinnaasariaqarppaa inuttut pisinnaatitaaffimi allannguuteqannginnissaat.

Kommune Kujalleq isumaqarpoq, pensionisiaqalernissamut akuersissuteqarnermut tunngaviusoq allannguuteqarsimanngippat isumaginninnikkut pensionisianik uterteqqusinissamut inatsisitigut tunngaviusoq pensionisiaqartup paasisimassagaa naatsorsuutigisariaqartoq, aamma uterteqqusineq pensionisiaqartup pilersuinissamut tunngaviinik allannguissanngitsaq.

Siusinaartumik pensionisiaqartut inuttut atugaat piffissap ingerlanerani allanngorsimanngippata siusinaartumik pensionisianik tunineqartarnissartik ilimagissanngilaat inuup atukkamigut piumasaqaatinik naammassinnissimanngippat. Tamanna tunngavigalugu siusinaartumik pensionisianik tunniunneqartunik ingerlaavartumik nalileeqqittarnissaq aallartinneqassaaq.

Aamma kommune isumaqarpoq, sumiiffimmi suliffissaqarneq immikkut ittumik piumasaqaatitut ilanngunneqassappat, qinnuteqartup inuttut tunngavii aallaavigalugit sulisinnaassutsimik nalilersuisarnerup isumaa tamarmi malunnaatilimmik naleqqukkunnaassoq.

Utertitsinissamut piumasaqarsinnaaneq ilanngaasinnaanerlu (missingiummi § 34, imm. 3) inatsisissatut siunnersuummi maleruaqqusanut tungassuteqartut, taakkunungalu nassuiaatit pillugit maleruaqqusat, ersernerluttutut kommunip isumaqarfigai:

Kommunip siullermik qularutigaa siunertaanersoq utertitsisarneq inatsisitigut iluarsisaaq inatsimmut ilaatinneqarniarnersoq imaluunniit pisuussutitut inatsimmik tunngaveqarluni killilimmik inatsisitigut iluarsisaaq utertitsisarnermut tapertaasoq pineqarnersoq (condictio indebiti).

Oqaaseqaatit tusaatissatut tiguneqarput aamma aalajangersakkat oqaaseqaatigineqartullu allannngortinneqanngillat.

§ 1, imm. 1-imut:

§ 1, imm. 1-imut nassuiaatini allassimavoq danskisut innuttaassuseqarnek danskisut innuttaassuseqarnermut inatsit malillugu nalunaarutigineqassasoq. Kommunip oqaatigaa innuttaassuseqarnek immikkut inatsisitigut aamma nalunaarutigineqarsinnaasoq.

Oqaaseqaatit tusaatissatut tiguneqarput, oqaaseqaatigiillu inatsimmut nassuiaatiniit peerneqarput.

Kapitali 3-imut

Kapitali 3-mi (§§ 8 aamma 9) suliamik misissuisarnissamut piumasaqaat nassuiarneqarpoq. Inatsisissatut siunnersuummut nalinginnaasumik nassuiaatini allassimavoq qinnuteqartup misissuineranut peqataajumanginnera suliap aalajangiiffigineqarnerani pingaartinneqassasoq. Kommunip paasissutissaq tamanna ajornartorsiutaasussatut isigaa, tassa inatsisini ingerlatsineranut tunngasuni maleruaqqusat nalinginnaasut malillugit suliap misissorneraneranut peqataannginneq pillugu pillaatissiisut innuttaasumut ajoqutaasussanngorlugu aalajangiinissamut tunngavissaqanngimmat.

Oqaaseqaatit tusaatissatut tiguneqarput, oqaaseqaatigiillu peerneqarput.

§ 26-imut

§ 26, imm. 2, nr 1-imi pineqarput pensionisiallit tarnikkut nappaatillit napparsimmavissuarnut inissinneqartussatut eqqartuussaasimasut.

Kommuni siusinaartumik pensionisiallit tarnikkut nappaatillit napparsimmavissuannut inissinneqartussatut eqqartuussaasimasut pillugit immikkut malittarisassaartoqassanersoq pillugu nalilersuisoqarnissaanik ujartuivoq.

Malittarisassanik atortinneqareersunik nalunaarutit aqqutigalugit siusinnerusukkut ersersinneqareersunik atuinikkut aalajangersagaq atoqqinneqarpoq. Oqaaseqaatit tusaatissatut tiguneqanngillat.

§ 28-imi, imm. 3-imut:

§ 28, imm. 3 malillugu meeqqanut tapit atorunnaassapput meeqqap sulinermi isertitai meeqqat tapiisa pingasoriaataattut amerlatigilerpata, taakkunanngaluunnit amerlanerulerpata. Kommunip piffissap qanoq ilinerata iluani piumasaqaatip taassuma naammassineqarnissaanik erseqqissaassuteqartoqarnissaa ujartorpaa.

Oqaaseqaatit tusaatissatut tiguneqarput, aalajangersagarlu atorunnaarsinneqarpoq.

§ 39-mut

§ 39, pkt. 1-imi pineqarput pinngitsaaliissummik pensionisianit akiliisitsisarneq. Immikkoortumi allami eqqaaneqarput piumasaqaatit taama ittut pillugit "isumaqatigiissutit allat". Tamanna allatut oqaasertalerneqartariaqarpoq, tassa pinngitsaaliissummik akiliisitsisarneq isumaqatigiissummik tunngaveqanngimmat.

Oqaaseqaatit tusaatissatut tiguneqarput, aalajangersakkamilu oqaasertarineqartut allanngortinneqarput.

§ 40-mut

§ 40, imm. 4 qulartitsilersinnaavoq, tassa "uppernarsaatinik nutaanik takkuttoqarsimanngippat" naammagittaalliuutit siusinaartumik pensionisiat pillugit maalaaruteqartarfiup itigartitsisinnaaneranut tunngaviliimmat.

Ingerlatseriaatsikkut aqutsineq pillugu nalinginnaasumik maleruaqqusanut tamanna aallaavimmigut naapertuutinngilaq, tassa ingerlatseriaatsimik aqutsineq innuttaasut ataqatigiinnerisa inatsisitigut innarlitsaalineqarnissaannut qulakkeerinnittuummat, ingerlatseriaatsikkut aqutsineq oqartussat siulliit assigalugit tamakkiisumik misissuinissamut pisussaammat.

Oqaaseqaatit tusaatissatut tiguneqarput, aalajangersagarlu atorunnaarsinneqarpoq.

§ 46-mut

Kommunip § 46, imm. 3 paasinngilaa, tassa aalajangersakkami atuarneqarsinnaammat suliaq ukiunik tallimanik piffissarititaasup iluani nalilersoqqinneqanngikkuni sulianut allanut sunniuteqarsinnaasoq.

Oqaaseqaatit tusaatissatut tiguneqarput, § 46-milu oqaasertarineqartut allanngortinneqarput.

3) Qaasuitsup Kommunia

Qaasuitsup Kommuniata tusarniaanermut akissuteqarnerani makku takuneqarsinnaapput: Qaasuitsup Kommuniata nalunaarutigaa tusarniaanermut killissarititaasoq 11. juli 2014-iusoq kommunip eqquutsissinnaanngikkaa, kommunimmi inatsisissatut siunnersuutip saqqummiunneqarnissaa periarfissaqarfiginngimmagu, tusarniaanermullu killissarititaasoq sioqqullugu naalackersuinikkut oqaluuserinninnissatsinnut oqaaseqaateqarsinnaannginnatta.

Qaasuitsup Kommunia kommunalbestyrelsip tullianik ataatsimeereernerani aatsaat tusarniaanermut akissuteqarsinnaavoq, tamannalu 2014-imi augustip naanerani pilersaarutaavoq.

Tamatuma saniatigut Naalakkersuisut KANUKOKA-llu akornanni isumaqatigiissut innersuussutigineqarpoq.

Qaasuitsup Kommuniata oqaaseqaatai tusaatissatut tiguneqarput. KANUKOKA-p tusarniaanermut akissuteqaataani oqaaseqaatigineqartut innersuussutigineqarput.

(4) Isumaginninnikkut Maalaaruteqartarfik

Ataatsimut isigalugu:

Suliap ataatsip nalilersoqqinneqarnera agguaqatigiissillugu nalunaaquttap akunnerini arfineq pingasuni naammassineqarnissaanera pillugu isumaq piviusorsioruunngilaq. Nalunaaquttap akunnerini 40-ni ingerlanneqartarnissaa piviusorsiorneruvoq.

Isumalluutit pillugit aallarniutigalugit oqaaseqaatigineqartut innersuussutigineqarput.

Isumasioqatigiit allattoqarfillu Ilaqutariinnermut Inatsisinillu Atuutsitsinnermut Naalakkersuisoqarfimmut inissinneqassappata pitsaavallaanngitsumik takutitsinerusaaq, tassa naalakkersuisoqarfiup siullertut siusinaartumik pensionisiat pillugit suliarisarmagit.

Siusinaartumik pensionisialinnut Maalaaruteqartarfik pillugu aallarniutigalugu oqaaseqaatigineqartut innersuussutigineqarput.

Inatsit pillugu:

§ 1-imut

§ 1-imut aamma § 3-mut tunngassuteqartut qupperneq 22-mi nassuiaatinut assersuullugit: piumasagaatit paasiuminaatsupilussuit erseqqissarneqartariaqarput.

Siusinaartumik pensionisiat pillugit inatsimmi nutaami § 3-mut nassuiaatini aalajangersakkat taakku marluusut assigiinngissutaat erseqqissarneqarpoq.

§ 3-mut

§ 3-mut tunngatillugu: oqaaseq ”utoqqalinermi pensionisiaqalernissamut piffissaliusaaq” imatut allanngortinneqartariaqarpoq ”utoqqalinermi pensionisiaqalernissamut piffissaliusaaq sukkulluunniit atuuttoq”. Inuit allattorsimaffianni paasissutissat naapertorlugit sumi najugaqarneq ilanngunneqartariaqarpoq.

Oqaaseqatigineqartut tusaatissatut tiguneqarput, inatsimmilu oqaasertarineqartut nassuiaatillu allanngortinneqarput.

§ 4-imut

§ 4, imm. 1-imut tunngatillugu, tamanna nalunaarummi oqaatigineqartariaqarpoq.

Inuit allattorsimaffiannut nalunaarsuisarnissamik pisussaataaffik qitiusumik inuit nalunaarsorneqarnissaat pillugu inatsimmi malinneqarpoq.

§ 6-mut

§ 6-imut tunngatillugu: siunissami isumaginninnikkut inissisimaneq pissutiginnarlugu sooq siusinaartumik pensionisiaqalersitsisoqartassanngitsoq tunngavilersorneqarsimanngilaq.

Siusinaartumik pensionisiaqarneq pillugu Nassuiaat 2008-meersumi inassutigineqartut tunngavigalugit allanngortitsisoqarsimavoq.

Kapitali 3

Paasiniaasarnerit piginnaanngorsaaqqiinerillu ataatsimut sivilunerpaamik ukiup ataatsip ingerlanerani naammassineqartarnissaat erseqqissartariaqarpoq.

Oqaaseqaatit tusaatissatut tiguneqanngillat. Tamatumunnga ilaatigut pissutaavoq piginnaanngorsaaqqittarneq, tamatumalu sivilussusaa piginnaanngorsartarneq pillugu peqqussummi malinneqarmata, tamatumanilu ukiut marluk angullugit piginnaanngorsaaqqittarneq sivilussuseqarsinnaalluni. Tamatuma saniatigut najukkani pissutsit pingaaruteqarsinnaapput paasiniaaneq piginnaanngorsaaqqinnerlu ukiup ataatsip iluani ingerlanneqarsinnaannginnerinut.

§ 8-mut

Oqaaseqatigiinni “-leqqissinnaanissaa”-p “annerusumik minnerusumilluunniit”-imik taarsertariaqarpoq.

“-leqqissinnaanissaa” paasiuminarnerummat oqaaseqaatigineqartut tusaatissatut tiguneqanngillat.

§ 9-mut

§ 9, imm. 1-imut tunngassuteqartoq qupperneq 28-mi nassuiaatinut atatillugu: Atornerluisunik piginnaanngorsaaqqinnermut atatillugu pineqartup katsorsarneqareerneranut piginnaanngorsaaqqinnerup kinguartinneqarnissaa takuneqarsinnaasariaqarpoq.

Oqaaseqaatigineqartut tusaatissatut tiguneqarput, aalajangersakkamilu nassuiaatit allanngortinneqarput.

§ 9, imm. 2-mut tunngatillugu: uiggiut ”-sinnaasoq” imatut allanngortinneqartariaqarpoq ”-sasooq”, tassa inuit annertuumik katsorsarneqarsinnaanngitsumillu nappaatillit piaarnerpaamik siusinaartumik pensionisiaqalersinniarlugit.

Oqaaseqaatigineqartut tusaatissatut tiguneqarput, tassa uiggiut: “-sinnaasoq” atorunnaarsinneqarmat.

§ 9, imm. 3-mut tunngatillugu: Inatsisip oqaasertaa imatut allanngortinneqartariaqarpoq: ”Piginnaanngorsaanissaq pinngitsoortinneqarsinnaavoq, piffimmi najugaqarfigisami piginnaanngorsaaqarnissaanut periarfissaqartoqarsimangippat, tassa aatsaat siusinaartumik pensionisiaqalernissamik qinnuteqartup nammineerluni piffimmi allami piginnaanngorsaaqqinneqarnissaq kissaatiginnippagu. Qinnuteqartoq allammi piginnaanngorsaaqqinneqarusuppat pineqartup taassumalu qitornaasa inissaannik immaqalu meeqqerivimmi inissaannik kommuni ikiuutissaaq.”

Oqaaseqaatigineqartoq tusaatissatut tiguneqanngilaq. Siusinaartumik pensionisiaqartup nammineq kommunitut najukkami avataani piginnaanngorsaaqqinnissamik qinnuiginnissinnaanera eqqarsaatigalugu oqaaseqatigiit taamaaginnarnissaat aalajangiusimaneqarpoq.

§ 10-imut

§ 10, imm. 2-mut tunngatillugu: ”ilaasortaq” kukkuneqarpoq.

Missingiummi § 10 tusarniaanermut akissutigineqartut tunngavigalugit atorunnaarsinneqarpoq.

Siusinaartumik pensionisiaqartitsisarnermi isumasioqatigiinnut taarsiullugu kommunini susassaartut akimorlugit ataatsimiititaliat inummik ilinniartitaanermik sulinermillu piginnaasaqarluartumik ilallugit atoraanni nukippassuit sipaarneqarsinnaapput.

Inatsimmi takuneqarsinnaasariaqarpoq siulittaasup, ilaasortat sinniisussallu Kalaallit Nunaanni najugaqartussaananerat.

Tusarniaanermut akissutigineqartut tunngavigalugit najukkani isumasioqatigiit atorunnaarsinneqarput, kommunalbestyrelsilu siusinaartumik pensionisianik akuersisarnermut aalajangiisartuussaaq.

§ 11-imut

Siunnersuutigineqartut marloqiusamik maalaaruteqartarfeqassappat suliap sularineqartarnerat malunnartumik sivitsorneqartussaavoq. Aamma kommunimi sullissit suliassat maalaaruteqartarfinnut marlunnet immikkoortiternissaannut nassiussuunnissaannullu nukiit atortassavaat.

Siusinaartumik pensionisiaqartitsinermit maalaaruteqartarfik pillugu aallarniutigalugit oqaaseqaatigineqartut innersuussutigineqarput.

§ 13-imut

§ 13-imut tunngatillugu: Erseqqissumik takuneqarsinnaassaaq kommunip siusinaartumik pensionisiaqartitsisarneq pillugu isumasioqatigiivisa sulisinnaassusermik qanorlu sulisinnaassuseqarnermik naliliinerat isumaginnittoqarfimmit inassuteqaammik tunngaveqarneris, imaluunniit paasissutissat pissarsiarineqartut tunngaviunersut.

Tusarniaanermut akissutigineqartut tunngavigalugit kommunalbestyrelsi siusinaartumik pensionisianut aalajangiisartussanngortinneqarpoq.

§ 15-imut

Nalilersuinerup nalilersueqqinnerullu aallartinneqarneranit kommunip siusinaartumik pensionisiaqartitsisarneq pillugu isumasioqatigiivini aalajangiisoqarnissaanut piffissaq qanoq siviutiginissanersaq allassimasariaqarpoq.

Oqaaseqaatigineqartut tusaatissatut tiguneqanngillat, tamatumunngalu pissutsit arlallit pissutaapput. Tamatumani ilaavoq najukkani pissutsit suliffissanullu periarfissat sulisinnaassutsip nalilernerani nalileqqinneranilu qanoq siviutiginissaannut pingaaruteqarsinnaammata. Sulisinnaassuseq inummut ataasiinnarmut tunngasuvoq, taamaammallu inummut naleqqussartariaqarput, taamaalillunilu siviunerpaaffissamut aalajangiinissaq ingerlatsinissamut sunniuteqartariaqarnani.

§ 15, imm. 4-mut tunngatillugu: Inatsisip oqaasertaani allassimavoq qinnuteqartoq periarfissaqassasq inassuteqaammik misissuinissamut oqaaseqaateqarnissamullu, qupperneq 7-imi nassuiaatini tamanna allassimavoq aammali inassuteqaasiornermi qinnuteqartoq

ilaatinneqassasoq. Tamanna paatsoorneqarsinnaammat erseqqissumik allassimasariaqarpoq qanoq annertutigisumik sumullu tunngatillugu qinnuteqartoq ilaatinneqassanersoq.

Tusarniaanermut akissutigineqartut tunngavigalugit missingiummi § 15, imm. 4 atorunnaarsinneqarpoq.

Kap. 6 il. il. ataatsimut isigalugit: Erseqqissarneqartariaqarpoq qaqugukkut pensionisiat uninngatinneqartassanersut, qaqugukkut pensionisiat atorunnaarsinneqartassanersut aamma qaqugukkut pensionisiat annertussusissaat 0 kr.-iusassanersut. Inatsimmi kap. 6, inatsimmi §§ 34 aamma 38 kiisalu qupperneq 13-imi nassuiaatit imminnut naapertuutivinngillat.

Sulilernissaq aningaasaqarniarnikkut iluaqutaasussanngorlugu inatsit aaqqissuussaavoq. Taamaaliornikkut siusinaartumik pensionisiat isertitassanut killiliussat assigiinngitsut aqutigalugit atorunnaarsinneqartarput, tamatumani apequtaalluni siusinaartumik pensionisiat appasinnerpaajunersut, qiterliunersut imaluunniit qaffasinnerpaajunersut. Oqaaseqaatigineqartut tusaatissatut tiguneqanngillat.

§ 18, imm. 4-mut:

Tassani erseqqissarneqarpoq isertitat “nammineq sulinermit” pisut pineqarmata. Takuneqarsinnaasariaqarpoq assersuutigalugu inuttaasoq annertuunik erniatigut isertitaqarpat sunik sunniuteqassanersoq. Takusinnaasat malillugit nammineerluni isertitat allatulluunniit isertitat (pensionisianit allanit isertitat pinnagit) pineqarnersut apequtaallutik malittarisassat assigiinngitsut atuutissanersut eqqarsaatigineqarsimannqilaq.

Oqaaseqaatigineqartut tusaatissatut tiguneqarput, nassuiaatinilu erseqqissarneqarpoq sulinermit isertitat tassaassasut isertitat nammineq sulineq aqutigalugu isertinneqarsimasut. Erniatigut isertitat isertitat imm. 3 malillugu qaqugukkut ikiliartortinneqarnissaannut sunniuteqartussaapput.

§ 20-mut

§ 20-mut tunngatillugu: takuneqarsinnaasariaqarpoq piffissami killilimmi siusinaartumik pensionisiaqartitsinissamik aalajangiisoqartillugu piffissap pineqartup naannginnerani nutaamik aalajangiisoqarnissaa. Aamma takuneqarsinnaasariaqarpoq taamatut aalajangiigallarnerup ataasiaannarluni pisinnaanera.

Oqaaseqaatigineqartoq tusaatissatut tiguneqarpoq, tassami nassuiaatini erseqqissarneqarmat piffissamik ukioq ataaseq angullugu sivitsuineq pillugu nutaamik aalajangiinissaq pisassasoq piffissap aalajangiunneqareersup qaangiutinnginnerani.

§ 22, imm. 3-mut:

Aningaasarsiaviit ilimagineqartut tunngavigalugit iluarsiiisoqarmat ilannguttariaqarpoq.

Nassuiaatini massakkut erseqqissarneqarpoq siusinaartumik pensionisiat aningaasat annaanegartussatut ilimagineqartut aallaavigalugit qaffanneqartussaammata.

§ 26-mut

§ 26-mut tunngatillugu: saneqqutsitsisinnaaneq pillugu malittarisassat ilanngunneqartariaqarput, tassa immikkut ittumik pisoqartillugu qaammatini sisamaannaanngitsuni piffissamili sivisunerusumi pensionisiat allannguuteqartinnagit tamakkerlugit tunniunneqartarnissaat periarfissaasariaqarmat, assersuutigalugu pineqartoq isertitsivimmiinnermini meeqqanut angajoqqaatut oqartussaassuseqarpat, taamaalu pineqartup piffissami pineqartumi angerlarsimaffimminik attassiinnarsinnaanera siunertamut naapertuutissalluni.

Oqaaseqaatigineqartoq tusaatissatut tiguneqanngilaq. Sivisunerpaamik qaammatinik sisamanik killiliiffik ingerlatsivimmi annerusumik takusaqarsinnaanerulernermik kinguneqartussaavoq, taamaaliornikkullu pineqaatissinneqarsimasunut isertitsivimmiinnerup nalaani siusinaartumik pensionisiat ingerlaannarnissaat takuneqarsinnaassammat.

§ 30-mut

Nakorsaait nakorsamit allagartalerneqartussaasut peqqinnissamullu tunngatillugu iliuutsit allat aallaaviatigut akeqanngillat.

Oqaaseqaatigineqartut tusaatissatut tiguneqarput, nassuiaatinilu erseqqissarneqartut atorunnaarsinneqarput.

§ 30, imm. 3-mut:

Una ilannguttariaqarpoq; tamanna pillugu aalajangiinermik allakkatigut ilisimatinneqarpoq.

Oqaaseqaatigineqartut tusaatissatut tiguneqarput, taamaalilluni inatsimmi oqaaseqatigiinni erseqqissarneqarpoq tamanna pillugu uppernarsaammik peqartoqartariaqartoq.

§ 31, imm. 3-mut:

Nassuiaatini allassimasoq, inuup nammineerluni qinnuteqarsimanngitsup siusinaartumik pensionisiaqalernissaanik kommuni tunniussisinnaanngitsoq inatsimmi erseqqissumik takuneqarsinnaasariaqarpoq. Tamanna ilutigalugu nammineersinnaassusiiaaneq pillugu maleruaqqusat innersuussutigineqartariaqarput.

Inatsimmi oqaaseqatigiinni iluarsisoqarpoq, taamaalillunilu ilanngunneqarpoq kommuni najugaqarfiusoq inuup kissaataanut akerliusunik sulianik pilersitsisinnaananilu aalajangiisinnaanngitsoq.

§ 32-mut

Piumasaqaatit naammassineqarnerannut sanilliullugu qinnuteqaatip tunniunneqarnerata kingorna aalajangiisartut aalajangiisartussaammata aalajangersagaq manna inuppassuarnut piffissami sivisuumi aningaasaqarnikkut ilungersunartorsioirtitsissaaq. Taamaammat tamanna allanngortinneqartariaqarpoq, tassa aalajangiineq qaqugukkulluunniit pigaluarpat siusinaartumik pensionisiassat ullormit piumasaqaatinik naammassiffiusumit aallartittumik akuersissutigineqartussanngorlugit. Kommuni aamma suliamik sivitsorsaalluni aningaasaqarnikkut iluanaarniuteqassanngilaq. Inuit siusinaartumik pensionisiaqalernissamik qinnuteqartut pisortat ikiorsiissutaannik tamakkiisumik taarsiiffigineqarsinnaassanngillat.

Oqaaseqaatigineqartut tusaatissaatut tiguneqanngillat, tassani aalajangeereernerup kingorna aatsaat siusinaartumik pensionisianik tunniussinissaq pisariaqartutut naliliiffigineqarmat.

§ 34, imm. 2-mut.

Erseqqissumik takuneqarsinnaassaaq aalajangiiffigisassaq kommunalbestyrelsimit aalajangiiffigineqassanersoq imaluunniit kommunip siusinaartumik pensionisiaqartitsisarneq pillugu isumasioqatigiivinit aalajangiiffigineqassanersoq kiisalu suna tunngavigalugu aalajangiisoqassanersoq. § 40, imm. 3-mut atatillugu aalajangersakkap inissisimanagera aallaavigalugu kommunalbestyrelsi tassaavoq aalajangiisussaq.

Tusarniaanermut akissutigineqartut tunngavigalugit missingiut allanngortinneqarpoq, taamaalillunilu kommunalbestyrelsi siusinaartumik pensionisiat unitsinneqarnerannut aalajangiisussanngorlugu.

Imm. 3: oqaatsit ”ilisimagaluarlugu pisinnaatitaanani” qupperneq 54-imi nassuiaatinut tunngassuteqartunut atatillugit sullissisut ilinniakkamikkut tunuliaqutaat arlallit eqqarsaatigalugit assut aqukkuminaassapput.

Oqaaseqaatigineqartut tusaatissatut tiguneqanngillat.

§ 37-mut

Tassani ilanngunneqartariaqpoq: ”imminut meeqqanilu pillugit”. Ilangunneqartariaqpoq tamanna pillugu aalajangiineq allaganngorlugu aalajangiiffigineqassasoq.

Oqaaseqaatigineqartut tusaatissatut tiguneqanngillat, tassami taamatut oqaaseqatigiiliorneq tulluurtutut isigineqarsinnaassanngimmat amerlasuutigut paatsoorneqarsinnaanera pissutaalluni. Taamaattorli nassuiaatini erseqqissarneqarpoq kommunip pilersuisussaatitaanermut pisussaaffigineqareersut eqqarsaatigisinnaagai, taamaaliornikkullu kommuni piviusorsiorlumik missingiinissaminut periarfissinneqassaaq.

§ 38, imm. 1-imut:

Tassani ilannguttariaqarpoq: ”allakkatigut aalajangiisoqareerpat”.

Oqaaseqaatigineqartut tusaatissatut tiguneqarput, tassami aalajangersagaq allannortinneqarpoq, taamaaliornikkullu inatsisip oqaasertaani takuneqarsinnaanngorlugu aalajangiineq pereersimassammat.

§ 39-mut

Tassani killeqanngitsumik pisariaqartitsineq pillugu malittarisassanut innersuussisoqartariaqarpoq.

Oqaaseqaatigineqartut tusaatissatut tiguneqanngillat, tassami killeqanngitsumik pisariaqartitsineq pillugu malittarisassanut innersuussinerit aalajangersakkamut nassuiaatini takuneqarsinnaareermata.

§ 40, imm. 2-imut:

”tamatumunnga tunngavissaqassapat” peertariaqarpoq. Ersernerluppoq pisoq tamanna pisumut nassuiaatini qupperneq 5-ip naqqani pineqartumut assingunersoq.

Tusarniaaanermut akissutigineqartut tunngavigalugit § 40 allannortinneqarpoq, missingiummilu imm. 2 atorunnaarsinneqarluni.

Imm. 4-mut: Aalajangersagaq manna peerneqartariaqarpoq, tassa innuttaasup oqartussaasunit marlunnit sullinneqarnissaata tunngaviusumik pisinnaatitaaffianut akerliummat.

Tusarniaaanermut akissutigineqartut tunngavigalugit § 40 allannortinneqarpoq, missingiummilu imm. 4 atorunnaarsinneqarpoq.

5) SIK

SIK-mit erseqqissarneqarpoq suliffissat taamak ikitsigitillugit siusinaartumik pensionisiallit suliffissaaleqisunik tuusintikkaanik unammillerteqarnerisa nalaani sulisinnaassusertik kingulleq atorlugu sulisinnaanissaannut periarfissat atornissaat pillugu Naalakkersuisut naatsorsuutigisaqarnerat piviusorsiortuunngitsoq. SIK-mit nalorninartoqartinneqarpoq aningaasaqarnikkut sipaarutit aqcutigalugit iluarsartuusseqqinnermi aningaasartuutaasut aningaasalersornissaat takoqqissallugit ilmanganngilluinnartoq.

Aningaasaqarnermut aallarniutigalugu nassuiaatigineqartut innersuussutigineqarput.

SIK qanorluunniit pisoqassagalarpat piumasaqarniannigilaq piumallerlunilu suliffiit ilaannakortumillu suliffiit isumaqatigiissusiorfiginissaannut, tamakkulu SIK-mit akuerineqarlutik, taamaaliornikkut qulakkeerniarlugu suliffinnik nalinginnaasunik allamut nuutsitsinerit pineqannimmata.

Iluarsartuusseqqinnermi naatsorsuutaavoq suliffissanik nutaanik pilersitsisoqassasoq massakkut suliffissanit matuneqarsimannigitsunik. Aaqqissuusseqqinnermi siunertarineqannigilaq suliffiit nalinginnaasut allanngortinneqarnissaat.

Tamatuma saniatigut akiligassaqarfimmit malersugaanissamut siunissami tamakkiisumik illersuisoqassannigilaq, siusinaartumik pensionisiat inummullu tapit pisortat oqartussaaffiitnut akiitsunut ilanngaatigineqarsinnaassammata.

Inatsimmut allannguut aqcutigalugu akiligassanut tamakkiisumik illersuisarneq kisimi ilaannakortumik atorunnaarsinneqassannigilaq. Kommunit pensionisiani tunniunneqartuni ilanngaateqarsinnaanerat killeqannigitsumik pisariaqartitsinermut aalajangersakkanik killeqartinneqartussaavoq.

Inatsisissatut siunnersuummi siunertarineqartunik naammassinnittoqassappat peqqinnissaqarfiup kommunillu piumasaqaatinut siusinaartumik pensionisiallit sulisinnaassusiannut piumasarineqartunut naammassinnissinnaanissaat pisariaqartinneqassaaq.

Iluarsartuusseqqinnermut atatillugu sulianik ingerlatsisunut ukiut arfineq-pingasut suliffiusussatut immikkoortinneqarsimapput, taakkulu atorlugit iluarsartuusseqqinnerup piviusunngortinnissaanut kommunit ikiorneqassapput, tak. aallarniutigalugit nassuiaatigineqartut.

Tassunga atatillugu oqaaatigineqassaaq inatsit aatsaat juulimi 2015-imi atortussanngortussatut naatsorsuutigineqarmat, taamaaliornikkullu kommunit ikiorneqarnissaat, inatsimmilu allannguutinut piareersarnissaat periarfissinneqassaaq.

6) Aningaasaqarnermut Nunamullu Namminermut Naalackersuisoqarfik

§ 21 aamma 22-mut

Aningaasaqarnermut Nunamullu Namminermut Naalackersuisoqarfimmiit erseqqissarneqarpoq §§ 21 aamma 22-mi aningaasarsiat akileraaruteqaataasussat aningaasarsianut tunngavittut innersuunneqartarmata, taakkulu atorlugit siusinaartumik pensionisiat iluarsineqartarlutik.

ANNN-ip siunnersuutigaa inatsisip oqaasertaa allangortinneqassasoq siusinaartumik pensionisiallip maannakut isertitaanut tunngassuteqartut naapertorlugit siusinaartumik pensionisiat aaqqiiffigineqarnissaannut inatsisitigut tunngavissaqalersillugu. Assersuutigalugu atorneqarsinnaapput sulinermi tunisaqarnermilu isertitat kingulliit.

Oqaaseqaatit tusaatissatut tiguneqanngillat. Aningaasarsianut massakkorpiaq tunngavigisassamut aalajangersimasumik taaguuteqartoqanngimmat aalajangiunneqarpoq siusinaartumik pensionisianut iluarsinerit aningaasarsiat akileraaruteqaataasussat aallaavigalugit pisassasut.

7) Ilinniartitaanermut, Ilageeqarnermut, Kultureqarnermut Naligiissitaanermullu Naalackersuisoqarfik

Naalackersuisoqarfiup erseqqissaatigaa, § 38, imm. 3-mi katissimallugu aapparisaq allassimasariaqartoq, tamannalu §§ 16, imm. 3 aamma 17-imi, imm. 3-mi aamma 18, imm. 3-mi taamaappoq.

Oqaaseqaatit tusaatissatut tiguneqarput, oqaasertaallu allangortinneqarput.

8) Peqqissutsimut Attaveqarnermullu Naalackersuisoqarfik

Qinnuteqaammik siusinaartumik pensionisialinnut isumasioqatigiissitanut suliassanngortitsilluni inassuteqartoqannginnissaanik kommunip aalajangiisinnaanera pillugu Peqqissutsimut Attaveqarnermullu Naalackersuisoqarfimmiit erseqqissarneqarpoq inatsimmut nassuiaatini erseqqissumik takuneqarsinnaanngimmat piumasaqaatit/tunngaviit sorliit naammasseqqaarlugit qinnuteqaammik inassuteqannginnissamut aalajangiisoqarsinnaanersoq. Suliap suliarineqarnissaanut inassuteqaatip itigartinneqarnissaanut kommuni aalajangiisinnaassappat iluarnerpaajussagalarpoq tamatumunnga piumasaqaatit suunersut erseqqissarneqartuuppata, aamma siusinaartumik pensionisianik tunniussinissamut piginnaatitsineq siusinaartumik pensionisialinnut isumasioqatigiinniippat aammalu qinnuteqartoq imaasinnaammat kommunip aalajangiineranut maalaaruteqarsimanngitsaq.

Tusarniaanermut akissutigineqartut tunngavigalugit isumasioqatigiit aaqqissuussaanerat allanngortinneqarpoq, siunissamilu siusinaartumik pensionisianut aalajangiinissamut piginnaatitsineq kommunalbestyrelsiniilerluni.

Inuussutissarsiornermut, Aatsitassanut Suliffeqarnermullu Naalackersuisoqarfik

Naalackersuisoqarfimmiit maluginiarneqarpoq siunissami nakorsaq pinnani kommuni sulisinnaassutsimut nalilersuisartuusussaasoq.

Siunissami inuup sulisinnaassusia nakorsamiit aalajangerneqartassanngilaq, taassumami innuttaasup timikkut peqqissusaa kisiat aalajangiiffigisassammagu. Innuttaasup atugarisai pillugit paasisutissat tunngavigalugit sulisinnaassutsimut aalajangiineq susassaqartut akimorlugit oqartussaasunit aalajangiiffigineqartassaaq. Siunissami nakorsamiit allagartaq aalajangiisartuussanngilaq, kisiannili innuttaasup atugaanut susassaqartut akimorlugit naliliisartut aalajangiisussaapput.

Naalackersuisoqarfiup sulisinnaassutsip naliliiffiginissaanut aalajangiiffiginissaanullu periutsit pillugit ilitersuut pineqartoq pigineqanngimmat ajuusaarnartutut isigaa, taannami atorlugu isumalluutitigut sunniutaasinnaasut naliliiffigineqarsinnaagaluar mata.

Sulisinnaassutsip naliliiffiginissaanut aalajangiiffiginissaanullu periutsit pillugit ilitersuutit inatsisip akuersissutigineqarneranut atatillugu suliarineqarnissaa ilimagineqarpoq.

Naalackersuisoqarfiup ilanngullugu maluginiarpaa innuttaasunik nalileeqqinniarluni sulinissami suliarnik ingerlatsisut arfineq-pingasut sulisoriniarneqarmata. Naalackersuisoqarfimmiit nalilerneqarpoq tamatuma kingornatigut allanik suliassaqaalertussaassasoq, tamakkununga ilaallutik inuit matchgruppe 3-miittut aqunneqarnissaanni immikkut suliaqartarnissaq, innuttaasunut siusinaartumik pensionisianik annikillisanik tunineqartunut suliffissamik nassaarniarnissaq kiisalu innuttaasunut siusinaartumik pensionisianut qinnuteqarlutik itigartinneqartunut suliffissamik nassaarniarnissaq. Taakku saniatigut qulaani taaneqareersutut sulisinnaassutsip naliliiffiginiarnerani suliassaqarnerulernissaq.

Isumalluutit pillugit aallarniutigalugu oqaaseqaatigineqartut innersuussutigineqarput.

Siusinaartumik pensionisiaqartitsineranut aaqqissuussinerup kingunerissavaa nakkutilliisussaataitanermut piumasarineqartut naammassisinnaajumallugit nukissanik amerlanerujussuarnik immikkoortitsisoqarnissaa pisariaqartinneqassammat. Taamaalilluni inatsisit nutaat oqimaannerusullu kingunerisaannik kommunini sulisunik naalackersuisoqarfiup nakkutilliinerulernissaa ilinniartitsinissaalu

pisariaqartinneqalersussaavoq. Tamatuma aamma kingunerissavaa inatsisit oqimaannerusut iluanni naalackersuisoqarfimmi sulisunik qaffasaanissamut nukissanik allanik pisariaqartitsisoqalissamat, taakkununga ilaalluni sulisinnaassutsimik naliliineq, tamatumani kommunini ingerlatsinermi ilinniartitsisinnaaneq nakkutilliisinnaanerlu angujumallugit.

Nakkutilliinerusooqarnissanut nukissanik allanik immikkoortitsisoqarnissaa eqqarsaatigalugu siunnersuutip aningaasatigut allatigut kinguneqarsinnaanera siunnersuummi erseqqissarneqarnissaa naalackersuisoqarfimmiit takorusunneqaraluarpoq. Taamatut pisoqarnerani konto pingaarneq 64.01.01 Inuussutissarsiornermut, Aatsitassanut Suliffeqarnermullu Naalackersuisoqarfik, allaffissorneq-mut allaffissornerunermut aningaasanik immikkoortitsisoqartussaassaaq, tamatumani kommuninut nakkutilliisussaataitanerup naammassinissaa eqqarsaatigalugu.

Siunnersuummi suligallartarnermut aaqqissuussisoqarnissaa siunnersuutigineqarpoq, massakkullu piginnaanngorsaqqittarneq pillugu peqqussummi suligallartarnermut aaqqissuussinernut misilittakkat eqqaassaganni naalackersuisoqarfimmiit isumalluartoqarpoq suliffeqarfinni suligallartussanik arlalinnik sulisoqalernissaanik, soorlu siunnersuummi tamanna pineqartoq. Massakkut taamatut suliffissaaleqisut amerlatigitillugit naalackersuisoqarfimmiit ilimagineqarpoq siunnersuummi ilimagineqartutut suligallarluni suliffissat taamak amerlatigisut nassaarissallugit ajornakusuussasoq.

Naalackersuisoqarfimmiit nalilernerqarpoq siusinaartumik pensionisiaqartut amerlanersaat pisortanit ikiorsiissutitut allanut nuukkusunnerussasut nammineq pilersornissaaq anguniarlugu allamik periarfissamik atuinatik, tassami suligallartarnissaa namminneerlutik piumannginnamikku.

Siusinaartumik pensionisiaqartitsinermit iluarsartuusseqqinneq ingerlarujoortussaavoq, tamatumani suliffissanik allanik nalinginnaasumik suliffissaqartitsinerup pilersissinnaanngisaannik pilersitsinissap qanoq pisariaqartigineranik ersersitsisusoq. Taamaammat ingerlatsinermi suliffiugallartartussat amerlanerit piginnaanngorsaqqinnissamullu periarfissat amerlanerit pilersinneqartussaassapput, taamaaliornikkullu pisariaqartinneqarlutik pilersut akiorsinnaajumallugit.

10) Nunatsinni Sulisitsisut Peqatigiiffiat

Nunatsinni Sulisitsisut Peqatigiiffiata erseqqissaatigaa siunnersuummi aallarniutitut aalajangersarneqassasoq kommunit siusinaartumik pensionisianut isumasioqatigiinnik pilersitsissasut. Namminersorlutik Oqartussat kommunit aqunneqarnerannut akuliukkaangata nalinginnaasumik kommunit akerralisarpur.

Tusarniaanermut akissutigineqartut tunngavigalugit isumasioqatigiit isikkuat allanngortinneqarpoq, siusinaartumillu pensionisianut aalajangiinissamut piginnaatitaaffik kommunalbestyrelsimiit tigummineqalerluni.

Nunatsinni Sulisitsisut Peqatigiiffiata erseqqissaatigaa siusinaartumik pensionisialinnut isumasioqatigiinnik pilersitsisoqarpat inuussutissarsiuteqartut sinniisuutitaqarnissaat eqqarsaatersuutigineqartariaqannginnersoq. Siusinaartumik pensionisiallit misiliillutik sulisalernissaannut atatillugu tamanna iluaqutaalluarsinnaavoq.

Qitiusumik siusinaartumik pensionisialinnut maalaaruteqartarfimmi aallartitaq ilisimasaqartuussaaq, suliffissaqartitsiniartarnerullu iluani ilisimasaqartuussalluni.

Nunatsinni Sulisitsisut Peqatigiiffiata erseqqissaatigaa, Isumaginninnikkut Suliat pillugit Maalaaruteqartarfiup saniatigut isumaginninnikkut maalaaruteqartarnermut aalajangiisartunik pilersitsisoqarnissaa. Isumaginninnikkut Maalaaruteqartarfik immikkut ilisimasalinnit oqaaseqaatinik pissarsiniarsinnaasassaaq, tamanna pisariaqartinneqalissagaluarpas.

Siusinaartumik pensionisialinnut maalaaruteqartarfeqarnissap siunertaraa maalaaruteqartarfiup taamaallaat sulisinnaassutsip annikillisimanera pillugu maalaarutitut isummertarnissaa. Siusinaartumik pensionisiaqalersut taakkua amerlassusaat eqqarsaatigalugit siusinaartumillu pensionisiaqalersitsinerup naliliivigineqartarnissaani pissusissamisoornerusutut nalilerneqarpoq qitiusumik maalaaruteqartarfimmik pilersitsisoqarnissaa, taamaallaat sulisinnaassutsip aalajangiiffigineqarnissaanut sulianik isumaginnittartussanik.

Nunatsinni Sulisitsisut Peqatigiiffiata erseqqissaatigaa naggataarutaasumik kapitali 14-imi aalajangersakkat aammaarluni misissorneqartariaqartut. Kommunip tamakkiisumik aningaasartuutunik akiliinissaa paasiuminaappoq, tak. § 41, imm. 1, peqatigitillugulu Naalakkersuisunut naatsorsuutunik tunniussaartoqassaaq, tak. § 42, taannaannaanngilarli, Naalakkersuisut Nunatta karsiata aningaasaatai piumasaaqatitalerlugu uterteqqusinnaavaattaaq, tak. § 44.

Oqaaseqaatit tusaatissat tiguneqarput, kapitali 14-illu oqaasertalerneqarneri allannguuteqartinneqarput.

11) BDO

§§ 16-18-imut

Siusinaartumik pensionisiat amerlassusiisa assigiinngittarnerat pillugu BDO apeqquaqateqarpoq, tamatumani siunertaanersoq,

ikinnerpaanik/akunnattunik/qaffasinnerpaanik siusinaartumik pensionisiaqarnermi pensionisiaqartarneq atorunnaarsinneqartarnersoq?

Aalajangersakkani siunertarineqarpoq siusinaartumik pensionisianik atuukkunnaarsitsisarnermi pissarsiarineqartartut killissaat ikinnerpaanut, akunnattunut qaffasinnerpaanullu assigiinngitsunik killissaqartitaasarnissaat.

BDO-mit apeqqutigineqarpoq siunertaanersoq, pensionisialinnut ikinnerpaanik siusinaartumik pensionisialinnut amerlanerpaanik isertitaqartartunut pensioni atuukkunnaarsinneqartarnersoq - tamatumani sulinissami aningaasatigut iluaquteqarsinnaanerup kajumilersitsinissaa eqqarsaatigalugu?

Aalajangersakkami siunertarineqarpoq sulilernissamut sulisinnaanerullu iluaqutigineqarnissaanut kajumissuseqalersitsisoqartassasoq. Ullumikkut maleruagassanut tunngatillugu annikillisaanerup annertussusia allannguuteqartinneqarpoq, taamaalilluni annikillisaanerup annertussusia annikillisinneqarluni, taamaaliornikkullu nammineerluni isertitaqartalernissamut kajumissuseqarneq annertusineqarsimalluni.

§ 32-mut

BDO-mit apeqqutigineqarpoq § 32 ima paasineqassanersoq - piumasaaqatit naammassineqareerneranni qaammatit pingasut qaangiunneranni suliaq aatsaat isumasioqatigiit naammassippassuk - isumasioqatigiit aalajangiinneranniit aatsaat siusinaartumik pensionisiaqartitsisoqartalernissaa?

Aalajangersagaq ima paasineqassaaq isumasioqatigiit aalajangernerisa kingorna aatsaat siusinaartumik pensionisiassat tunniunneqartarnissaat. Siusinaartumik pensionisiaqalersitsisarnerup kingumoortumik pisarnissaa periarfissaqanngilaq.

§ 35-mut

BDO isumaqarpoq pissusissamisoornerussasoq aalajangersagaq tamanna qanoq iliornikkulluunniit ima erseqqissaavigineqassasoq, kommunini tamani maleruagassat assigiit naapertorlugit sulisoqartassalluni, siusinaartumillu pensionisiallit kommunimiit kommunimut assigiimmik pineqartalersillugit.

Naalackersuisoqarfik maleruagassamik suliaqarpoq, tamatumani inatsiseqartitsinerup sulinermi aqutsivigineqartarnissaa nassuiarlugu.

§ 40-mut

BDO-mit apequtigineqarpoq § 40, imm. 1-imi Isumaginninnikkut Suliat pillugit Maalaaruteqartarfimmut maalaarutit Siusinaartumik pensionisialinnut Maalaaruteqartarfiup aalajangii-nerannik Maalaaruteqartarfimmut maleruagassiat ilaat tassunga attuumassuteqarnerisut?

Tusarniaanermut akissutigineqartut tunngavigalugit § 40-mi allanngortitsisoqarpoq, taamaalillunilu Isumaginninnikkut Suliat pillugit Maalaaruteqartarfimmut maalaarutit qitiusumik siusinaartumik pensionisialinnut maalaaruteqartarfimmut maalaaruteqarnissamut periarfissanut ajunnginnerusumik attuumassuteqarsinnaaqqullugit. Allanguuteqartitsinermi kissaatigineqarpoq Siusinaartumik pensionisialinnut isumasioqatigiit aalajangiinerannik Maalaaruteqartarfiup qinnuteqaateqartup sulisinnaassusia isummerfigissammaq. Maalaarutinut isumasioqatigiit inissititerneqarnerat ilisimasaallu pequtigalugit sulisinnaanerup aalajangiivigineqarnissaanut tunngatillugu taakku tassaassapput saaffigisassat eqqortut. Taamaattumik Isumaginninnikkut Naammagittaalliuuteqartarfik tassaassaaq sulisinnaaneq pillugu maalaarutinik aalajangiisarnermi maalaaruteqartarfiusartussaq.

12) ASG

ASG-mit erseqqissarneqarpoq kommunit aqqissuussinermit allatut atuisinnaanerit aqutigalugu sulisussanik allanik sulisoqalernissap siuarsarnissaanut aningaasalersueriaaseq allanngortinneqartoq atorineqarsinnaassasoq, tassami kommuni annerusumik suliniummut aningaasalersuisussaassammat. Tamanna pereersimangippat tassunga atatillugu pissusissamisoornerussagaluarpoq suliffeerunnermi aningaasat tunniunneqartartut aningaasalersornissaanut aningaasalersueriaaseq sorleq atorineqarnerisooq paasiniaaffigissallugu, taamaaliornikkullu pissutsit tamakku assinganik aningaasalersorneqarnissaat qulakkeerlugu.

Apequtigineqartut erseqqissaaffiginissaanni massakkorpiaq naatsorsuinernik erseqqinnerusunik peqartoqanngilaq.

Naalackersuisoqarfimmi siusinaartumik pensionisialinnut maalaaruteqartarfimmik pilersitsisoqarnissaanut atatillugu ASG-mit iluatsillugu apequtigineqassaaq tamatumunnga atatillugu oqartussaaffiup taassuma Atuisunut Unammilleqatigiinnermullu Aqutsisoqarfimmut ilanngunneqarnissaani aningaasatigut allaffissornikkulluunniit sipaaruteqartoqarsinnaanera isummersuutigineqarsimanersoq.

Siusinaartumik pensionisialinnut maalaaruteqarfik pillugu aallarniutigalugu oqaaseqatigineqartut innersuussutigineqarput.

Siunnersuummi takuneqarsinnaavoq sulisinnaassutsip naliliiffiginiarnerani periuseq sorleq atussallugu kissaatigineqarnersoq suli aalajangiiffigineqarsimanngitsoq. Tassunga atatillugu ASG-mit naggasiutigalugu oqaatigineqassaaq Danmarkimi Socialministeriaqarfik sulisinnaassutsip naliliiffiginiarneranut periuserineqartartut pillugit ajunngilluinnartumik quppersakkamik suliaqarsimammat: “Sulisinnaassutsip naliliiffiginissaanut periuseq – periuseq sulisinnaassutsip nassuiarnissaanut, ineriartortinnissaanut naliliiffiginissaanullu atorneqarsinnaasoq.”

Sulisinnaassutsip naliliiffiginiarneranut periutsimik suliaqartoqarnissaani suleriaqaqqinnissamut oqaaseqaatigineqartut ilanngunneqarsinnaassapput.

13) Inuit Pisinnaatitaaffii pillugu Instituti

Inuit Pisinnaatitaaffii pillugit Institutimit inassutigineqarpoq – inuit ataasiakkaat inuit pisinnaatitaaffeqarneranni soqutigisaasa siuarsarnissaat siunertaralugu – inatsisissatut siunnersuut ingerlaavartumik nalilersorneqartassasoq, tamatumani inuit ataasiakkaat inuuniarnermikkut atugarisaasa, isumaginninnikkut atugarisatigut qularnaarinninnissap il.il. kingunerisinnaasaasa aalajangersaaffigineqarnissaat siunertaralugu.

Aalajangersagaq tusaatissatut tiguneqarpoq, iluarsartuusseqqinnermillu Naalakkersuisut ingerlaavartumik nalilersuisarnissaat ilimagineqassaaq.

Inuit Pisinnaatitaaffii pillugit Institutimit inassutigineqarpoq – ilisimasanut tunngavigineqartut nukittorsarnissaat siunertaralugu – inuit innarluutilit massakkorpiaq siusinaartumik pensionisiallit imaluunniit siusinaartumik pensionisianik neqeroorfigineqartussat qanoq isillutik, qanorlu iliornikkut suliffissaqalersinnaanerannut aaqqissuussamik ilisimasanik katersuisoqassasoq.

Inuit Pisinnaatitaaffii pillugi Institutimiit inassutigineqartut tusaatissatut tiguneqarput.

Inuit Pisinnaatitaaffii pillugit Institutimit inassutigineqarpoq siusinaartumik pensionisialinnut malittarisassanik allanngortitsinnginnermi inunnut innarluutilinnut suliffissanik suliffiugallartussanillu pilersitsisoqarnissaanut suliniummik aaqqissuulluakkamik aallartitsisoqassasoq.

Iluarsartuusseqqinnermut atatillugu ilimanarpoq suliffissanik nutaanik pilersitsisoqarumaartoq. Tassunga atatillugu suliffissanik inunnut innarluutilinnut naleqquttunik pilersitsisoqarnissaanut periarfissaqalissaaq.

Inuit Pisinnaatitaaffii pillugit Institutimit inassutigineqarpoq – inuit pisinnaatitaaffiisa innarlerneqannginnissaasa qulakkeerneqarnissaa siunertaralugu – suliffeqarfiup iluani avataanniluunniit assigiinnngisitsisarnermut ataatsimut inerteqquteqarnermik eqqussisoqassasoq, tamatumanilu sulisitsisut inuit innarluuteqartut naammaginartumik naleqqussartarnissaannut pisussaaffilerneqarnerat ilanngunneqarpoq.

Inuit Pisinnaatitaaffii pillugit Institutimiit inassutigineqartut tusaatissatut tiguneqarput.

14) KNIPK

KNIPK-mit erseqqissarneqarpoq §§§ 16, 17 aamma 18-imut innersuussisoqarnerani siunnersuutigineqarsimasoq siusinaartumik pensionisiat annertussusilerneqarneranni aapparisaq aningaasarsiai apeqqutaatinneqarumaartut, tamannalu KNIPK-mit assut eqqarsarnartoqartoq.

Malittarisassanik atortinneqareersunik ingerlatitseqqiineq matumani pineqarpoq, tassami siusinaartumik pensionisiaqartup inooqatigisaata, katillugu aapparisaata aamma aapparisaata isertitaat siusinnerusukkut siusinaartumik pensionisianik tunniussinissami apeqqutaasarsimmata.

15) PPK

PPK-mit erseqqissarneqarpoq suliat ilimagineqartumik suliarineqarnerusalernissaannut aningaasanik allanik tunniussaqaarnissaq siunnersuummi ersinngimmat, siunnersuummilu ersinnani Naalakkersuisut qanoq isillutik siunnersuutigissaneraat aningaasat taakku agguaanissaanni suut tunngavigineqassanersut kiisalu pitsaassutsimik qulakkeerrinninnissaq qanoq ingerlanneqassanersooq nassuiaaffigineqarnani.

Inatsimmut nalinginnaasumik nassuiaatini takuneqarsinnaavoq sulianik ingerlatsisut arfineq-pingasut ukiumut suliffigisartagaannut kommuninut 3,2 mio. kr.-inik tunniussisoqartussaasoq. Sulianik ingerlatsisut kommuninut ilitsersuinermit, siunnersuinermit il.il. ikiuuttassapput. Tamakku saniasigut isumalluutit pillugit aallarniutigalugu oqaaseqaatigineqartut innersuussutigineqarput.

PPK-mit sipaarutissatut ilimagineqartunut erseqqissarneqarpoq sipaarutissat qanoq annertutigisut sipaarutissatut ilimagineqarnerisut erseqqissumik takuneqarsinnaanngimmat, taamatullu ilimagisaqarnermut suna tunngavigineqarnerisooq kiisalu takuneqarsinnaanani inatsisissatut siunnersuummi ilimagineqartutut atugarissaarnerup tungaatigut suut ajunngitsumik sunniutaajumaartut erseqqissarneqarsimanatik.

Aningaasaqarnikkut pissutsit pillugit aallarniutigalugu oqaaseqaatigineqartut aamma aningaasaqarnermut naatsorsuinerit pillugit inatsimmut nalinginnaasumik nassuiaatit innersuussutigineqarput.

PPK-mit siunnersuutigineqarpoq inatsimmut tunngatillugu iluatsitsisimanermit uuttuutitut kinaassusersiunngitsumik kinaassusersiortumillu isummersortoqartariaqartoq, naggasiullugulu tamatumunnga malitseqartitsisarnermut piffisaliussanut erseqqinnerusumik oqaatiginnittoqartariaqartoq.

Oqaaseqaatigineqartut tusaatissatut tiguneqarput, siusinaartumillu pensionisianut iluarsartuusseqqinnermi suliap nanginneqarnissaanut ilanngunneqarsinnaallutik.

PPK-mit nangillugu ajunngitsumik sipaaruteqarnissamut tunngatillugu qinnuiginnittoqassaaq suna tunngavigalugu kommunini ukiumut immikkut suliffiusussani sipaarniarnermi aningaasartuutaasussanik qaangiinissani suut ilimagineqarnersut minnerpaamik nassuiaaffigineqassasut, sunalu tunngavigalugu siusinaartumik pensionisialinnut isumasioqatigiit pilersinneranni ingerlannerannilu, tassungalu allattoqarnermi suut ilimagineqarnersut.

Aningaasaqarnermut pissutsit pillugit aallarniutigalugu oqaaseqaatigineqartut innersuussutigineqarput.

Siusinaartumik pensionisialinnut Maalaaruteqartarfik pillugu PPK-mit apeqqutigineqarpoq maalaaruteqartarfiup Siunnersuisoqatigiinnut Aalajangiisartunullu Aqutsisoqarfimmut inissinneqarnissaa eqqarsaatigineqarsimanersoq, taamaalillunilu allattoqarfimmut tunngatillugu sunniutaasinnaasut/sipaarniutaasinnaasut anguneqarsinnaanersut, taamatuttaarlu allattoqarfik sunnertikkuminarnerussanersoq/ inummut attuumassuteqarpallaalissannginnersoq.

Siusinaartumik pensionisialinnut maalaaruteqartarfimmut aallaniutigalugu oqaaseqaatigineqartut innersuussutigineqarput.

Naalakkersuisoqarfiup siusinaartumik pensionisiallit qanoq amerlatigisut siusinaartumik pensionisiaqartitsinermit aniumaarnersut pillugit missingiineranut PPK aperivoq aningaasaqarnikkut kingunerisassai ilanngullugit naatsorsorneqarsimanersut siusinaartumik pensionisiallit utaqqiisaasumik siusinaartumik pensionisianik tamakkiisunik tunineqassagaluarpata.

Siusinaartumik pensionisiallit qanoq amerlatigisut siusinaartumik pensionisiaqartitsinermut aaqqissuussinermiit peerneqarnissaannik naliliinermi siusinaartumik pensionisiallit qanoq amerlatigisut isertitaqaannassanersut tunngavigalugit naliliisoqarpoq, taamaalillutik siusinaartumik pensionisiaqarnermut aaqqissuussinermut ilaaginnarsinnaajunnaassammata. Tamakku saniatigut aningaasaqarnikkut kingunerisassai pillugit aallarniutigalugu oqaaseqaatigineqartut innersuussutigineqarput.

PPK-mit apequtigineqarpoq pineqartut 90%-iisa siusinaartumik pensionisiaat allanngortinnagit ingerlatiinnarnissaat pinnagu piginnaanngorsartinnissaat aqutigalugu aningaasaqarnikkut kingunerisassai naatsorsorneqarsimanersut. PPK-mit nangillugu paaserusunneqarpoq piginnaanngorsaaqqiinerit aqqusaareerlugit taakkunannga procentit qassit nalinginnaasumik sulileqqissinnaassanersut misissoqqissaarneqarsimanersaq.

Inatsimmik piareersaatigalugu sulinermut atatillugu apequtigineqartut pillugit erseqqinnerusumik naatsorsuisoqarsimangilaq. Tamatuma saniatigut piginnaanngorsaaqqinnerup kinguneratigut qassit nalinginnaasumik sulileqqissanersut pillugit nalinginnaasumik oqaaseqaatigineqartut innersuussutigineqarput.

Inatsimmi § 3 aamma 7-imut tunngatillugu PPK-mit nalilernerqarpoq aalajangersakkat pineqartut naligiimmik pinnittarnissaq pillugu ingerlatsinermi nalinginnaasumik tunngavimmut akerliusinnaanerat itigartinneqarsinnaanngimmat, taamatuttaarlu tamatumunnga tunngatillugu europami inuit pisinnaatitaaffiinut isumaqatigiissummut akerliusinnaammat.

Inatsimmi § 7 naapertorlugu siusinaartumik pensionisianik tamakkiisunik tunniussisoqarsinnaavoq najugaqarnermut piumasaaqammi najugaqarnissap 5/6-ia naammassineqarsimappat. Tamakkiisumik siusinaartumik pensionisiaqarnissamut piumasarineqartoq naammassineqarsimangippat inuup Kalaallit Nunaanni ukiuni qassini najugaqarsimanagera apequtaatillugu siusinaartumik pensionisiat tunniunneqarsinnaassapput. Tamanna tunngavigalugu nalilernerqanngilaq assigiimmik pinnittarneq pillugu ingerlatsinikkut tunngavigineqartoq saneqqunneqarsimassasoq. Tamanna pillugu aamma europami inuit pisinnaatitaaffiinut isumaqatigiissut unioqqutinneqarsimasutut nalilernerqarpoq.